

共同經課-1 撒母耳記上十五章三十四節～十六章十三節

34 撒母耳去 Láh-má；掃羅上去伊 ê 厝，到掃羅 ê Ki-pí-a。35 撒母耳到伊死 ê 日，無 koh 來見掃羅；因為撒母耳為 tiòh 掃羅憂悶。耶和華因為設立掃羅做以色列王也退悔。16:1 耶和華 kā 撒母耳講，我已經棄 sak 掃羅，無 hō伊做以色列王，你為 tiòh 伊憂悶 beh 到 joā 久 ah？你 tiòh 用角貯油滿滿；去 ah，我 beh 差你去伯利恆人耶西 hia；因為我 tī 伊 ê kiáⁿ ê 中間備辦一個王。2 撒母耳講，我怎樣 thang 去？掃羅若聽見，伊 beh thài 我。耶和華講，你 thang 帶一隻牛 á kap 你去，就講，我來是 beh 祭獻耶和華。3 你 tiòh 請耶西來赴 chit-ê 祭祀；我 beh 指示你所應該行 ê 事；我所指示你 ê 人，你 tiòh 替我 kā 伊抹油。4 撒母耳就照耶和華 ê 話去行，到伯利恆；城裡 hiah-ê 長老 lóng ngiàuh-ngiàuh-chhoah，出來迎接伊講，你來是為 tiòh 平安 mah？5 伊講，為 tiòh 平安；我是 beh 祭獻耶和華；lín tiòh 清氣家己，來 kap 我赴祭祀。撒母耳就 hō耶西 kap 伊 hiah-ê kiáⁿ 清氣，叫 in 來赴祭祀。6 In 已經來，撒母耳看見 Í-lī-ap，意思講，耶和華所 beh 抹油 ê，果然 tī 伊 ê 面前。7 總是耶和華 kā 撒母耳講，莫得看伊 ê 容貌，kap 伊身軀 ê 大漢；chit 人是我所拒絕；因為耶和華 teh 看無親像人 teh 看；人看外貌，耶和華是看心內。8 耶西叫 A-pí-ná-tát，hō伊 tùi 撒母耳 ê 面前經過；撒母耳講，耶和華也無揀 chit 人。9 耶西 koh 叫 Sa-má 經過；伊講，耶和華也無揀 chit-ê。10 耶西 hō伊 hiah-ê kiáⁿ 七個，lóng tùi 撒母耳 ê 面前經過。撒母耳 kā 耶西講，耶和華也無揀 chiah-ê。11 撒母耳 kā 耶西講，你 ê kiáⁿ lóng tī-chia mah？伊應講，Iáu 有一個 soah 尾 ê，taⁿ teh 飼羊。撒母耳 kā 耶西講，你差人 chhoā 伊來，因為伊 iáu 未來，咱無 beh 坐桌。12 就差人 chhoā 伊入來；伊是赤色，目矚清秀，生做好看。耶和華講，chit 人就是，你起來 kā 伊抹油。13 撒母耳就用角內 ê 油，tī 伊 hiah-ê 兄 ê 中間抹伊；tùi hit 日起，耶和華 ê 神大大臨到大衛。撒母耳起身 tò 去 Láh-má。

共同經課-2 詩篇二十篇

1 大衛ê詩；交 hō樂官。1) 願耶和華 tī 患難ê日聽你；願雅各ê上帝ê名安置你 tī 高ê所在；2 Tùi 聖所幫贊你，Tùi 錫安扶持你。3 記念你一切所獻ê，接納你ê燒祭。[Sè-làh] 4 照你ê心所ài-ê hō你，成你一切ê計畫。5 阮 beh 因為你ê救恩來唱歌；阮 beh 奉阮ê上帝ê名來 khiā 旗。願耶和華成你一切所求ê。6 Taⁿ 我知耶和華救伊受抹油ê，Beh 對伊聖ê天聽伊；用伊 chhiáⁿ 手ê氣力救伊。7 有人 oá靠車，有人 oá靠馬；獨獨阮 beh 講起耶和華阮上帝ê名。8 In 仆落跋倒；阮就起來 khiā 在在。9 求耶和華拯救；阮求叫ê時，願王聽阮。

共同經課-3 哥林多後書五章六節～十節、十四節～十七節

6 所以阮常常好膽，知阮 tiàm-tī 身軀就是 kap 主相離，7(因為阮 teh 行，是 tùi 信 m̄是 tùi 所看)；8án-ni 阮好膽，也 koh-khah 歡喜離開身軀，kap 主 saⁿ-kap tiàm。9 所以無論 tiàm-tī 身軀 á 是離開身軀，阮所致意 ê，是 hō伊歡喜。10 因為咱眾人的確 tiòh 顯明 tī 基督 ê 公座前，hō ták 人照伊 tùi 身軀所行 ê tai-chì，或是好，或是 pháiⁿ，來受報應。14 因為基督 ê 疼痛催逼阮，是阮想一人替眾人死，就是眾人死；15koh 伊替眾人死，是 beh hō chiah-ê 活 ê 人以後無為 tiòh 家己來活，是為 tiòh 替 in 死來 koh 活 ê。16 所以阮 tùi taⁿ 以後，無照肉體 bat 人；雖然 bat 照肉體 bat 基督，taⁿ 以後無 koh án-ni bat 伊。17 所以人若 tiàm-tī 基督，就是做新創造 ê，舊 ê tai-chì 已經過去，taⁿ lóng 變成新 ê。

共同經課-4 馬可福音四章二十六節～三十四節

26Koh 講，上帝 ê 國親像人掖種 tī 地裡；27 暝時暝，日時起來，hit-ê 種子發，koh 漸漸大，伊 m̄知 hit-ê 所以然。28 地自然生物；起頭是秧，後來有穗，koh 後來穗就結成五穀。29 五穀已經熟，就用 koeh-á；因為收割 ê 時到 lah。30 Koh 講，上帝 ê 國咱 beh 怎樣來比並伊？á 是用甚麼譬喻表明伊 ah？31 是親像一粒芥菜子掖落地，雖然比地上百項 ê 種子 khah 細粒，32 但是已經掖落去，就發生漸漸 khah 大 tī lóng 總 ê 菜蔬；koh 發出大 ê 枝，致到空中 ê 鳥 oē 歇伊 ê 蔭下。33 伊用 choē-choē 親像 chit 號 ê 譬喻傳道理 hō in，照 in 所會聽 ê。34 若無用譬喻就無 kā in 講；到單單學生 kap 伊 tī-teh ê 時，就 lóng 總 kā in 解明。